



Sud Bosne i Hercegovine
Суд Босне и Херцеговине

Broj: S1 3 Iž 038431 20 Iž
Sarajevo, 29.10.2020. godine

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Vesne Trifunović kao predsjednika vijeća, Zvezdane Antonović i Srete Crnjaka kao članova vijeća, odlučujući o žalbi Radana Pajkanovića, rue Pas de l ours 39, Crans Montana, Schweiz, izjavljenoj na odluku Centralne izborne komisije Bosne i Hercegovine, broj: 05-1-07-1-997/20 od 01.10.2020. godine, o utvrđivanju i objavi broja birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020.godine, na nejavnoj sjednici održanoj dana 29.10.2020.godine donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, utvrđen je i objavljen broj birača upisanih u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, na kojem spisku se nalazi i žalitelj.

Žalitelj je protiv navedene odluke blagovremeno izjavio žalbu navodeći adresu rue Pas de l ours 39, Crans Montana, Schweiz, kao adresu sa koje želi da glasa izvan BiH. Naknadnom provjerom na stranici izbori.ba vidio je da je prijavljen na adresi u Srbiji i moli da se isprave netačni podaci.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbaci kao nedopuštena ili odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu, Centralna izborna komisija BiH je, prije donošenja ožalbene odluke, a prilikom razmatranja prijave dostavljene dana 25.08.2020.godine putem e mail adrese ilicvera20@gmail.com na ime žalitelja, utvrdila da je dostavljen obrazac prijave za glasanje izvan BiH za Radana Pajkanovića, uz koji je dostavljena kopija lične karte za imenovanog. S obzirom da je prijava za glasanje izvan BiH ispunjavala sve uslove propisane odredbom člana 3.15 Izbornog zakona BiH, žalitelj Radan Pajkanović se nalazi na izvodu iz Centralnog biračkog spiska za glasanje izvan BiH iz Srbije.

Imajući u vidu da je navedena žalba dostavljena putem e-maila, da ista nije potpisana i da žalitelj nije dostavio niti jedan dokaz kojim bi potkrijepio navode iz žalbe, Centralna izborna komisija BiH je zaključila da se radi o zloupotrebama biračkog prava, te da žalba nije osnovana.

Naime, u konkretnoj situaciji nesumnjivo se radi o zloupotrebi biračkog prava, međutim, Centralna izborna komisija BiH na osnovu raspoloživih činjenica nije bila u mogućnosti utvrditi ko je počinio zloupotrebu biračkog prava za glasanje izvan BiH, jer je zloupotreba mogla biti učinjena, kako od strane žalitelja, tako i od strane trećih lica. Međutim, u svakom slučaju žalitelj će biti u mogućnosti da iskoristi svoje biračko pravo i da po želji glasa na svom redovnom biračkom mjestu u Općini Ugljevik, u Republici Srpskoj.

Žalitelju će, ukoliko na dan Lokalnih izbora 2020.godine dođe na redovno biračko mjesto određeno prema njegovom mjestu prebivališta, biti omogućeno da glasa nepotvrđenim kovertiranim glasačkim listićima (član 5.18 Izbornog zakona BiH) koji će biti potvrđeni i prebrojani u Glavnom centru za brojanje, s tim što će Centralna izborna komisija BiH u Glavnom centru za brojanje izuzeti glasački materijal dostavljen eventualno i iz inostranstva na ime žalitelja i isti neće biti ponovo prebrojan, a sve u cilju spriječavanja zloupotreba biračkog prava i omogućavanja ostvarivanja biračkog prava biračima kojima ono zaista pripada.

Prema odredbi člana 5.18 Izbornog zakona BiH, ako se ime birača ne nalazi na izvodu iz Centralnog biračkog spiska zato što se birač upisao u Centralni birački spisak da glasa izvan zemlje, a vratio se da glasa lično u Bosni i Hercegovini, njegovo ime dodaje se na poseban obrazac koji sadrži sve podatke kao i izvod iz Centralnog biračkog spiska. Birač se potpisuje na izvod i ima pravo glasati nepotvrđenim-kovertiranim glasačkim listićem, u skladu sa odredbama ovog zakona.

S obzirom na navedeno apelaciono vijeće je ocijenilo da se pobijanom odlukom Centralne izborne komisije BiH ne povrijeđuje biračko pravo žalitelja.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

Predsjednik vijeća
Sudija
Vesna Trifunović